

ողւով առանց ագահելոյ և ոչ դանկի միոյ, 'ի քննութիւն արկցեն զինդ իրն, թէ ո՞րպէս մտանէին Հայք մինչեւ ցարդ 'ի Գերեզմանն յաւուր ձրագալուցի, և թէ դիմեա՞լ իցեն առ Պատրիարքն Յունաց, և յոր՞ժմ ժամանակի լեալ իցէ առաջնութիւն նոցին, որ բացայայտ ետուն դրել 'ի հրովարտակին իւրեանց . եւ արդարութեամբ ստուգեսցին սեփհականութիւնք, կանթեղք եւ այլ ամենայն տեղիք պարագայիւք՝ Հայոց և Յունաց 'ի տաճարի անդ, և հաստատեսցի գրով և կնքով վերակացուաց, և զինի ընթերցման եւ գիտութեան Տէրութեան, արձանագրեսցի 'ի տեղւոջ իւրում:

Եւ յաղագս վիճին Հայոց եւ Յունաց, որ պատահի 'ի Ս. Յարութիւն, այլ եւս մի՛ տացի հրովարտակ, և զի իսպառ բարձից խռովութիւնն 'ի միջոյ, եւ կարգաւորեսցի խնդիրն, պատուէր տալիք Կայսերական ատենին և Մալթայի դիւանաց:

Իրիգոր Պատրիարք Երուսաղէմի: Յովհաննէս Պատրիարք Կոստանդինուպօլսի . եկեղեցականք Հայոց, եւ այլք:

Ի հասանիլ հրամանի Կայսեր յԵրուսաղէմ . դատաւորն արար ժողով մեծ, կոչեաց եւ զայլազգի դռնապանսն Ս. Յարութեան, եկին և փոխանորդքն Հայոց և Յունաց և ընթերցաւ հրովարտակն առաջի ամենեցուն: Ապա եհարց դատաւորն ցփոխանորդն Հայոց Հաննա վարդապետ, թէ զի՞նչ իցեն խնդիրք ձեր, ետ նա պատասխանի եւ ասէ, 'ի սկզբանէ մինչեւ ցայսօր Կայսերական հրովարտակօք և վաւերական գրովք հաստատեալ է երեկոյի Պատեքլին Հայոց և Յունաց 'ի միասին մտանել 'ի Գերեզմանն Քրիստոսի և լուցանել զճրագունս: Իսկ փոխանորդն Յունաց Նէոփիտոս 'ի նախընթաց ամի խարեյութեամբ հանեալ հրովարտակ, արգել զմուտս մեր, պատճառելով թէ մեր է առաջնութիւնն, եւ թէպէտ 'ի վաւերական գրոց հաստատեցաւ յայնժամ իրաւունքն Հայոց, այլ նա յեցեալ 'ի բանքս հրովարտակին, ոչ կամեցաւ ունկն մատուցանել այնց գրոց: Իբրեւ հարցաւ եւ 'ի նմանէ, արար պատասխանի եւ ասէ, ճշմարիտ են գրեանքն 'ի ձեռս Հաննա վարդապետի, և ոչ երբէք բռնացեալ եմք 'ի վերայ Հայոց սակս